

# Sat 3rd Sulat Ud

## San Juan

---

### Sat Luglugin Dituwa Sulat

<sup>1</sup>Kan sika napotoga Gayo:

Sakon si Juan un panglakayon di manuttuwa un mansulat kan sika un pipiyaoka bu<sub>l</sub>un kun manuttuwa utdan katuttuwaana maipanggop kan Jesu Kristu.

<sup>2</sup>Napotoga gayyom, iluwa<sub>l</sub>uk un kapkapiya ka kan nabilog nat long-ag nu un kama't din tigammuka kabilog nat pammatim. <sup>3</sup>Amod tun lagsak ku un makagnog<sub>l</sub> sidat ibagbagan dat dumatonga susunuda umoy sinat un ipapasnok nu dat tuttuwan tudtudu, un sanat mantatagum talona maiyannatup sit katuttuwaan. <sup>4</sup>Maid sabali ut makaitod si amoda lagsak ku nu adi san makagnog<sub>l</sub>ak un mantattagu dan aabeng ku un umuunnud sit katuttuwaan.

### Naidaydayaw Si Gayo

<sup>5</sup>Napotoga gayyom, sanat tumultu<sub>l</sub>ungam sidan sunuda manuttuwa talon sidan kakkaili, nabalu nat un kokkoom. <sup>6</sup>Impadamag dat dummatong sidan manuttuwa't tu dit amoda nampipiyam kan dida. Ot napiya nu itultuluy nun tu<sub>l</sub>ungan dida utdan masapul da utdan daddalan da ta siya'd maibagaya koon sidan manselselbi kan Apudyus. <sup>7</sup>Ta lummakkat da un umoy mangipatigammu't dan maipanggop kan Jesu Kristu un adi da nangkodaw si tu<sub>l</sub>ung sidan adi manuttuwa. <sup>8</sup>Siya'd gapuna un ditaku'n manuttuwa lobbong taku'n tumu<sub>l</sub>ung sidatuwa tagu dalapnu maitagom taku't din mantudtuduwan da utdin katuttuwaan.

### Sada Diotrefes Kan Demetrio

<sup>9</sup>Nansulatak sidan manuttuwa't nat yoong adin Diotrefes ikaskasu ta adina bigbigon dit kalintogak. Ta piyaona nu siya'd mabigbiga pangat. <sup>10</sup>Isunga nu umoyak sinat ibagaka losan sidan bu<sub>l</sub>una manuttuwa dat

umoy na mangliklikudan kan dikami. Bokona sadi'l lawa dat kokkoona. Adina pay sangailiyon dan susunuda umoy sinat. Iyapa na dan mamiyan mampalnok kan dida. Ot sadat mamalnok, lassigona dida't dit simbaan.

<sup>11</sup> Napotoga gayyom, adika okyan makapang-ila utdan laweng, nu adi sad napiya dan unudom. Ta sat mangwa't napiya, tagun Apudyus. Yoong sat mangwa't dan laweng Adina payyan tigtigammu si Apudyus.

<sup>12</sup> Napiya'n losan dan ibagbagan dat udum maipanggop kan Demetrio. Ot mapanoknokaan pay dit kinabalu na un tagu utdit mantatagu na un maisayun sit katuttuwaan. Pati dikami panoknokaan mi pay din kabalu na un tagu ot tigammum un tuttuwa dan ibaga mi.

### Maudi Un Bagbaga

<sup>13</sup> Adu payyan datun ibagak kan sika, yoong madik piyaona isulat.

<sup>14</sup> Ulay ta nanam-oka masapa'n ilak sika ot siya'd mambagbagaan ta.

<sup>15</sup> Iluwaluk ta kapkapiya ka.

Pakumustaon dika utdan gagayyom nu uttu. Sin-ossaom pay un pakumustaon danat gagayyom sinat.